

中華律藏

中華律藏

第五十三卷

近現代高僧學者講律（十二）

國家圖書館出版社

四分律比丘戒本今釋卷四

律學沙門釋子弘川述

○第十二被擯不服戒

此戒大乘同制，律攝云，由受用鄙事故，而行污他家，由家慳煩惱，制斯學處。

△緣起

律云，佛在舍衛國，祇樹給孤獨園，時鞞連邑有二比丘，一名阿濕婆，此云馬師二名富那婆娑，此云滿宿在鞞連邑行惡行，污他家，彼作如是非法，自種華樹，教人種華樹，自溉灌，教

人漑灌，自摘華，教人摘華，自作華鬘，教人作華鬘，自持華鬘與人，教人持華鬘與人。與彼村中婦女，共同一牀坐起，同一器飲食，言語戲笑。或自歌舞倡伎，或他作已唱和，或俳說，俳音排，俳說即戲也，俳優即雜戲也或彈鼓簧吹貝，作孔雀音，或嘯，或自弄身，或受雇戲笑。時衆多比丘，從迦尸國來至犍連，晨朝著衣持鉢入村乞食，法服整齊，行步庠序，低目直前，不左右顧視，以次乞食。諸居士見之，反以爲非，不施飲食。諸比丘問知其故，乃知彼行惡行，污他淨信，到舍衛國，具以白佛。佛遣舍利弗，目犍連，往犍連與阿濕婆，富那婆娑作羯磨，何以故，是汝等弟子，應作白四



羯磨，應作舉，作憶念，應作罪，衆中應差堪能羯磨人，作如是白。

大德僧聽，此阿濕婆，富那婆娑，在鞞連污他家行惡行，污他家亦見亦聞，行惡行亦見亦聞，若僧時到，僧忍聽，今僧爲阿濕婆，富那婆娑，作擯羯磨，汝等污他家行惡行，污他家亦見亦聞，行惡行亦見亦聞，汝等行惡行出去，不應在此住，白如是。

大德僧聽，此阿濕婆，富那婆娑，在鞞連污他家行惡行，污他家亦見亦聞，行惡行亦見亦聞，今僧與阿濕婆，富那婆娑，作擯羯磨，此二人污他家行惡行，污他家亦見亦聞，

行惡行亦見亦聞，汝等污他家出去，不應在此住，誰諸長老忍，僧爲此二人作擯羯磨者默然，誰不忍者說。是初羯磨，第二第三亦如是說
僧已忍，與阿濕婆，富那婆娑，作擯羯磨竟，僧忍默然故，是事如是持。

僧爲作羯磨時，彼二比丘作是言，衆僧有愛，有恚，有怖，有癡，更有餘同罪比丘，有驅者，有不驅者，而獨驅我，舍利弗，目犍連爲彼二比丘作羯磨已，還舍衛國，以此事白佛。世尊以無數方便訶責已，聽僧與彼作訶諫，白四羯磨，應作如是白。

大德僧聽，此阿濕婆，富那婆娑在鞞連，僧與作擯羯磨時，

便作是言，僧有愛，有恚，有怖，有癡，有如是同罪比丘，有驅者，有不驅者，若僧時到，僧忍聽，今僧與阿濕婆，富那婆娑作訶諫，捨此事故，汝等莫作是言，僧有愛，有恚，有怖，有癡，有如是同罪比丘，有驅者，有不驅者，而諸比丘不愛，不恚，不怖，不癡，汝等污他家行惡行，污他家亦見亦聞，行惡行亦見亦聞，汝等污他家行惡行，白如是。

大德僧聽，此阿濕婆，富那婆娑在鞞連，僧與作羯磨時，便作是言，僧有愛，有恚，有怖，有癡，有如是同罪比丘，有驅者，有不驅者，僧今與阿濕婆，富那婆娑作訶諫，捨

此事故，汝等莫作是言，僧有愛，有恚，有怖，有癡，有如是同罪比丘，有驅者，有不驅者，而諸比丘不愛，不恚，不怖，不癡，汝等污他家行惡行，污他家亦見亦聞，行惡行亦見亦聞，汝等污他家行惡行。誰諸長老忍，僧與阿濕婆，富那婆娑作呵諫，捨此事者默然，誰不忍者說，是初羯磨，第二第三亦如是說，僧已忍，與阿濕婆，富那婆娑，作呵諫羯磨竟，僧忍默然故，是事如是持。

佛令僧與彼作訶諫，白四羯磨已，爲諸比丘結戒，欲說戒者，當如是說。

舍衛者，或云室羅筏悉底，舊云舍衛。此云聞物，寶物

多出此城，亦翻豐德。(一)具財寶，(二)妙五欲，(三)饒多聞，(四)豐解脫。在中印度境，乃波斯匿王之都城也。○祇樹者，祇，卽祇陀，此云戰勝，因波斯匿王戰勝之日，生此太子，因而賜名，以表誌慶。樹乃太子所施也。○梵語須達多，此云樂施，今言給孤獨者，以能賑乏濟貧，哀孤卹老，時美其德，號曰給孤獨，勝軍王大臣。須達多爲兒聘婦，到王舍城，寄止珊瑚檀那家，見夜起莊嚴舍宅，營辦餽饈。須達問言，大士，欲請國王，爲婚姻之會耶。珊瑚檀那答言，請佛，無上法王。須達聞已，身毛皆豎，復問何以名佛。珊瑚檀那廣說佛之功德。須達言，



所言佛者，功德無量，今在何處。珊檀那曰，在王舍城竹林精舍。須達遂往見佛，聞佛說法，獲須陀洹果，因請佛曰，願佛至舍衛國，受我微供，佛即受請。須達回國，布金買園，祇陀發心施樹，故云祇樹給孤獨園。

△立戒相

若比丘，依聚落，若城邑住，污他家，行惡行，污他家亦見亦聞，行惡行亦見亦聞。諸比丘當語是比丘言，大德，污他家，行惡行，污他家亦見亦聞，行惡行亦見亦聞，大德，汝污他家，行惡行，今可遠此聚落去，不須住此。是比丘，語彼比丘作是語，大德，諸比丘有愛，有恚，有怖，有癡，有

如是同罪比丘，有驅者，有不驅者。諸比丘報言，大德，莫作是語，有愛，有恚，有怖，有癡，有如是同罪比丘，有驅者，有不驅者，而諸比丘不愛，不恚，不怖，不癡。大德，污他家，行惡行，污他家亦見亦聞，行惡行亦見亦聞。是比丘如是諫時，堅持不捨者，彼比丘應三諫，捨此事故，乃至三諫，捨者善。不捨者，僧伽婆尸沙。

釋曰：此戒分六節釋。若比丘依聚落下，明舉所爲之非。諸比丘當語是比丘下，明驅擯之法。是比丘語彼比丘，作是語下，明非法比丘反謗如法僧衆。諸比丘報言下，明諫捨謗擯。是比丘如法諫時下，乃訶諫白四羯磨。不捨者下，

結成違諫之罪◎律云，比丘義如上說。若比丘，依聚落，若城邑住者。若比丘，是指阿濕婆，富那婆娑二比丘也。依，謂依止彼處而住也。聚落，卽村落也，謂巷陌街衢住處，名之爲聚。村外遠家，名之爲落。城邑者，屬王，君王都處也。城者盛也，以城盛民也。邑者，都邑也，天子所宮曰都。周禮以四縣爲都，四井爲邑。又諸候子弟封邑亦曰都。凡邑有先君之廟曰都，無廟曰邑。今稱縣亦曰邑。○家者，律云，有男有女。污他家者。有四種事。一者依家污家。謂從一家得物，與一家，所得物處，聞之不喜，所與物處，思當報恩，卽作是言，若有與我者，我當報之，

若不與我者，我何故與，是爲依家污家。二者依利養污家。若比丘，如法得利，乃至鉢中之餘，或與一居士，不與一居士，彼得者卽生是念，當報其恩，其有與我者，我當報之，若不與我，我何故與，是爲依利養污家。三者依親友污家，若比丘，依王若大臣，或爲一居士，或不爲一居士，所爲者，卽思當報恩，其爲我者，我當供養，不爲我者，我不供養，是爲依親友污家。四者依僧伽藍污家，若比丘，取僧華果，與一居士，不與一居士，得者卽作是念，其有與我者，我當供養，不與我者，我不供養，是爲依僧伽藍污家。是謂四種事污他家，污者，清朝德基律師云，「謂污

染他人平等淨信，揀別施供也。」○行惡行者。謂自種華樹，自漑灌，自摘華，自作華鬘，自持華鬘與人，復教人作如上事，乃至受雇戲笑，是爲行惡行也。○污他家行惡行，亦見亦聞者。謂作非法惡行之事，衆人悉見聞知。律攝云，「由依污家，生衆罪故，見謂眼識，聞謂耳識，知謂餘識，此顯見聞疑性。」性者實也，此非虛妄而說也。○諸比丘，當語是比丘言，此是持法比丘，諫彼非法比丘之詞大德，是尊稱非法比丘之語污他家行惡行，污他家亦見亦聞，行惡行亦見亦聞，大德，污他家行惡行，今可遠此聚落去，不須住此者。這一段戒文，是僧團中持法比丘，對彼非法惡行比丘，驅擯之語也。○是比

丘，語彼比丘作是語，大德，諸比丘有愛，有恚，有怖，有癡，有如是同罪比丘，有驅者，有不驅者。此是持法比丘，驅擯污他家比丘，而彼不服反生謗僧之語也。毘尼止持會集云，「有愛者，謂愛念之者，當驅而不驅。有恚者，謂瞋恚者，不當驅而即驅。有怖者，謂於逃去者，不敢治罰。有癡者，謂無智慧，有污家輩，不善分別，可擯，不可擯者。」○諸比丘報言，此是持法比丘衆說大德，莫作是語，有愛，有恚，有怖，有癡，有如是同罪比丘，有驅者，有不驅者，而諸比丘不愛，不恚，不怖，不癡，大德，污他家行惡行，污他家亦見亦聞，行惡行亦見亦聞者。此乃持法比丘，別

諫彼非法比丘之詞也。○是比丘_{是非法比丘}如是諫時，堅持不捨者，彼比丘_{是持法比丘}應三諫，捨此事故，乃至三諫捨者善。謂在僧中三諫捨者，即不犯本罪也。○不捨者。謂再堅持不捨者，即違諫，犯本罪也。

定罪——是中犯者，若比丘依聚落住，污他家行惡行，污他家亦見亦聞，行惡行亦見亦聞。彼比丘諫此比丘言，大德，污他家亦見亦聞，行惡行亦見亦聞。大德，污他家行惡行，可捨此事，莫爲僧所呵，更犯重罪，若隨語者善◎若不隨語者，應作白，作白已，應求言，大德，已作白，餘有三羯磨在，可捨此事，莫爲僧所呵，更犯重罪，若捨